

AKASHVANI AIZAWL

REGIONAL NEWS UNIT

DRUG RELATED DEATH

Kumin kum chanve chhungin Mizoramah ruihhlo vingin mi 33 an thi tawh a, heroin leh a kaihhnawih avanga thi an tam ber.

Excise & Narcotics Department in a chhinchhiah danin, kumin January thla atanga tun thla July ni 2 thleng khan Mizoramah ruihhlo avangin mi 33 an thi tawh a, heng zinga mi 28 chu mipa niin, midang 5 chu hmeichhia an ni a, ruihhlo vanga thi te hi thalai kum 19 atanga kum 44 inkar an ni a, an zinga mi 9 te chu Heroin vanga thi an ni a, midang 24 te chu heroin leh ruihhlo dang tihpawlh vanga thi an ni thung a ni.

Excise & Narcotics Department in Mizorama ruihhlo vanga thi a chhinchhiah tan kum 1984 atanga kumin thlengin Mizoramah ruihhlo vingin mi 1912 an thi tawh a, a zinga mi 1681 te chu mipa niin, 231 te chu hmeichhia an ni a, ruihhlo vanga thi tawh zingah kum 14 mi chu a naupang ber a, kum 58 chu a upa ber thung a ni.

Kum 2004 kha Mizorama ruihhlo vanga thi an tam ber tum niin mi 143, mipa 122 leh hmeichhia 21 an thi a, khatih hunlai khan Proxyvon chu an thihpui tam ber a ni a, kum 2015 chho atangin ruihhlo vanga thi zingah Heroin vanga thi an tam tan a. Kum 2005 hnulamah kum 2023 kha ruihhlo vanga thi an tam leh ber tum niin, mi 76 in ruihhlo vingin nunna an chan a ni.

Heroin leh Proxyvon bakah hian Alprazolam, Cataspa, Corazepam, khuh damdawi tui chi Cough Syrup, Dendrite, Diazepam, Ganja, Nitrosun, Pacitane (pepe), Parvon Spas, Peptica, Respira D, zu, codeine leh damdawi mum dang te an thihpui a ni.



SAMVIDHAN HATYA DIWAS

India ram danpui palzut ni champhaphak, Samvidhaan Hatya Diwas pualin vawiin khan Siaha ah leh Hnahthial District ah Exhibition buatsaih a ni.

Sawrkar laipui Ministry of Culture in June Ni 25 chu Samvidhan Hatya Diwas (Ram danpui palzut ni) atana a lo puan tawh behchhanin District pahnihah hian hun hman a ni a, Siaha District ah chuan hmun 4 ah exihibition neih tura ruahman niin July ni 11 khan DRDO conferenc Hall ah exhibition buatsaih alo ni tawh a, Vawiinah BDO office Complex ah hun hman niin July ni 18 hian Art and Culture Department, MADC in a buatsaih veleh anga, a tawpna ber hi Tipa ah neih tura ruahman a ni.

Vawiina Exhibition ah hian India ram zalenna sualtute sulhnu thenkhat bakah Kum 1975 National emergency puan a nih lai chanchin te phochhuah a ni a, heng bakah hian Democracy Rama Danpui (Constitution) pawimawhna video tawi phochhuah nghal a ni. Zirlai naupangte bakah mipui tam takin he exhibition hi chhimin signature board a tar ah an hming an ziak theuh bawk a ni.

Hnahthial ah chuan DC Conference Hall-ah Bawrhsap, Pi K.Vanlalruati hova hun hman a ni a, Bawrhsap chuan kum 1975-a National Emergency puan a nih champha hriat reng nan mai mi lovin Indian Danpui hman sual a nih dan leh hman sual a nih tawh loh nana mipuite kan inralrin reng theihna tur atana he hun hi buatsaih a nih thu a tarlang a. Mipuite, a bikin mi retheite zalenna leh dikna chanvo rah behna rapthlak tak thlengin India ramin zalenna a neih hnu a hun thim ber, tih hiala sawi a lo ni ta a ni" tiin he hun hman a tul chhan a sawi a ni.

Samvidhan Hatya Diwas hi Kum 1975 June ni 25 ah India ram Prime Minister Pi Indira Gandhi in Article 352 hnuaia Emergency a puan champha hriatrengna puala hun hman a ni a, kumin hi a kum 50-na cham a nih angin Sawrkar laipui chuan hetiangamhang tur hian ruahmanna siamin mipuite dikna chanvo inzirtirhar lehna leh Democracy ram tana Danpui (Constitution) a pawimawh thu inzirtirna hun puala buatsaih a ni.

GOVERNOR FINANCIAL ASSISTANCE FUND

Vawiin chawhnu dar 1 khan DC office Chamber ah Addl DC Pu Abraham Beirazi Khithie chuan Siaha District-a home hrang hrang paruk hnenah Governor Financial Assistance Fund a sem chhuak.

Vawiina hun hmanah hian Addl DC Pu Abraham Beirazi Khithie chuan tanpuina an semna kawnga thawktute chu an fakawm tih sawiin tan la zual sauh turin a fuih a, home-a awm te enkawl chu thil harsa anih avangin inpekna thuk tak nen tih a ngaih avangin theihtawp chhuah zel turin a sawm a, thawktute nen an inkawmna ah home hrang hrang atanga rawn kal te chuan an hmalak dan leh an harsat te Addl DC an sawipui a ni.

Governor Financial Assistance Fund Siaha District-a sem chhuah hi kumin atan a vawihnihna tur a ni a, Kalvary Healing Home, Charity Home, Saikao, Grace Children Home, Siaha Child Adoption Centre, Agape Home leh Orphanage Boys Home te hnenah cheng ₹25,250 theuh pek chhuah a ni.



SKILL INDIA MISSION

Vawiin khan Skill India Mission kum 10 tlinna lawm a ni a, Prime Minister Narendra Modia’n kum 2015 atanga a bul tan he Mission hian thalaite hnathawhna, kutkawih eizawmna leh hmasawmna ngialnghet an neih theihna tura industry nena thawhhona a buatsaih a ni.

Skill Development and Entrepreneurship Minister Jayant Chaudhary chuan sorkar in kawng hrang hranga thalai te tihchak a tum tih sawiin skill India hnuaiah ramchhunga thalaiten hma an sawn nasa a ti a, hmeichhe dinhmun chawikan bakah dinhmun hnuaihnunga awm thin thlengin hmasawmna hmel an hmu tih a sawi.



PRESIDENT

President Droupadi Murmu chu vawiin khan Ravenshaw University kum13-na convocation ah a tel a, Odisha-a Cuttack a Ravenshaw Girls High school building 3 siamthatna tur lungphum a phum dawn bakah Kum 2024 chhunga Kalinga Ratna Award pawh cuttack ah hian a hlan nghal dawn a ni.



ISS

Indian Astronaut Shubhanshu Shukla leh Axiom-4 a thawk mi 3 te chuan International Space Station (ISS) ah ni 18 an cham hnu in vawiin hian khawvel ah an kir leh dawn a, nimin khan orbiting laboratory ISS atangin SpaceX Dragon ah an insawn a, darkar 22 vel zet khawvel pan hian an rawn let dawn a, Splashdown hi US-a California tuipei kamah vawiin tlai dar3 hian a thlen an beisei a ni.

